

Oqaluuserisassanut nassuiaat

(Inatsisartut Siulittaasuat)

Sisamanngormat 17. oktober ataatsimiinnitsinni oqaluuserisassani immikkoortut 46, 114, 115, 59, 87, 94, 105 aamma 126 angumerinngitsoorparput, taamaattumillu ullumi ataatsimiinnermi oqaluuserineqartussat ingerlateqqinneqarsimallutik.

Immikkoortut pineqartut tassaapput:

Immikkoortoq 46: Uunga siunnersuut: Tapersiissutitalimmik inissialiortiternermut taarsigassarsitsisarneq pillugu Inatsisartut inatsisaata allangortinnissaa pillugu Inatsisartut inatsisaat (Atuisarnerup erseqqissaaffiginera)

Immikkoortut 114 aamma 115 ataatsimut oqaluuserineqartussat:

Immikkoortoq 114: Sulinermik inuussutissarsiuteqartut sulinerup nalaani ullormut minuttini 30-ni timigissarsinnaatitaallissappata tamatuma namminersorlutik inuussutissarsiuteqartunut pisortanullu aningaasatigut allaffissornikkullu kingunerisassaanik misissuinermik aallartitsinissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinermi taamatuttaaq tamatuma innuttaasut peqqissusiannut kingunerisassai taamatullu aamma inooriaatsimik pissuteqartumik nappaatit appariarnissaasa naatsorsuutigineqartup malitsigisaanik napparsimalluni sulinngitsoortarnerit Peqqinnissaqarfimmullu aningaasartuutit ikinnerulernerisa inuiaqatigiit aningaasaqarniarnerannut sunniutissai qulaajarneqassapput. Misissuineq UKA 2025 nallertinnagu Inatsisartunut agguanneqassaaq. Inatsisartunut ilaasortaq Anna Wangenheim, Demokraatit

Immikkoortoq 115: Piffissaq sapaatip akunneranut nalinginnaasumik suliffiusartoq ullumikkut nalunaaquttap akunneri 40-sunit 35-inut appartinneqarpata, tamatuma aningaasatigut, inuiaqatigiinnut peqqissutsikkullu kingunerisassaanik misissueqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuineq UPA 2025 nallertinnagu Inatsisartunut agguanneqassaaq. Inatsisartunut ilaasortaq Anna Wangenheim, Demokraatit

Immikkoortut 59 aamma 87 taamatuttaaq ataatsimut oqaluuserineqartussat:

Immikkoortoq 59: Savaateqarfinnut inoqarfinnullu allanut nannut tikiuttut qimaatinniarsareqqaarnagit takunneqqaartumit pisarineqarsinnaalersillugit Namminersorlutik Oqartussat nalunaarutaanni nr. 5-imi, 6. marts 2023-meersumi aalajangersakkat allangortinneqarnissaannik Naalakkersuisut peqquneqarnissaannik Inatsisartut

aalajangiiffigisassaattut siunnersuut. Nannup pisarineqartup neqaa najukkami agguanneqassaaq sinneralu pisaqartumut tunniunneqarsinnaassalluni.

Inatsisartunut ilaasortaq Mariane Paviassen Jensen, Inuit Ataqtigiit

Immikkoortoq 87: Nunatta kujataani nannuttassiissutigineqartartut ukiumut sisamaasut 2025-imiit ikinnerpaamik ataavartumillu qulinngortinneqarnissaat qulakkeeqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

Inatsisartunut ilaasortaq Anders Olsen, Siumut

Immikkoortut 94 aamma 105 taamatuttaaq ataatsimut oqaluuserineqartussat:

Immikkoortoq 94: Meeqqat 18-inik ukioqalernissami tungaanut pisortat ingerlataannik angalatitsiviit aqutugalugit angalasussaattillutik meeqqatut akeqalernissaat, aningaasatigut qanoq naleqassanersoq Naalakkersuisut misissuinissaannik Inatsisartut aalajangiiffigisassatut siunnersuut. Misissuineq meeqqat akikinnermik angalasarnerannut malittarisassat allanngortinnissaannik tunngaviliissaaq, kingusinnerpaammilu UPA2025-mi inatsisartunut saqqummiunneqassalluni.

Inatsisartunut ilaasortaq Jens NapätôK, Naleraq

Immikkoortoq 105: Soraarninngornikut pisortat ingerlataannik angalatitsiviit aqutugalugit akikinnerusumik angalasinnaanerat ukioq naallugu atuutilernissaa aammalu soraarninngornikunut billetsit ukioq naallugu killeqanngitsumik pisiassaasinnaanerat aningaasatigut qanoq naleqassanersoq Naalakkersuisut misissuinissaannik Inatsisartut aalajangiiffigisassatut siunnersuut. Misissuineq soraarninngornikut akikinnermik angalasarnerannut malittarisassat allanngortinnissaannik tunngaviliissaaq, kingusinnerpaammilu UPA2025-mi inatsisartunut saqqummiunneqassalluni.

Inatsisartunut ilaasortaq Jens NapätôK, Naleraq

Kiisalu immikkoortoq 126, tassani pineqarluni:

Pisortat namminersortullu suliffeqarfiini sulilerlaat tamarmik sullivimmi isumannaallisaanermik ilinniagaqarsimanissaasa inatsisitigut piumasaqaataalernerata aningaasatigut allaffissornikkullu kingunerisassaasa ersersinneqarnissaat siunertaralugu nassuiaasiornissamik Naalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaat UKA 2025 nallertinnagu Inatsisartunut agguanneqassaaq.

Inatsisartunut ilaasortaq Anna Wangenheim, Demokraatit

Siulittaasoqarfiup aalajangerpaa immikkoortup 7-ip, 2025-imut aningaasanut inatsisissatut siunnersuutip, aappassaaneerneqarnissaa ullumi ataatsimiinnissamit novembarip ulluisa aqqarnannut kinguartinneqassasoq.

Ulloq manna oqaluuserisassanut nassuiaammut ilanngullugu paasissutissiissutigineqarsinnaavoq immikkoortut tulluuttut oqaluuserineqarfissaat allanngortinneqarmata:

Immikkoortup 99-ip aappassaaneerneqarnissaa oktobarip ulluisa 22-annit novembarip ulluisa 20-annut nuunneqarpoq.

Tassani pineqarpoq:

Inatsisartunut aalajangigassatut siunnersuut Naalakkersuisut peqquneqassasut inatsimmik pilersitseqqullugit, angajoqqaq/eqartussaassusermik tigummiartoq meeqqamut ataatsimik arlalinnilluunniit innarluuteqartumut imaluunniit arlalinnik innarluuteqartumut akissarsiatigut taarsiivigineqarnissamik, pineqartoq meeqqap innarluuteqarnerata malitsigisaanik sivikinnerusumik suliguni. Tamanna pissaaq meerasisaq angerlarsimaffimmi najugaqartoq qassinilluunniit ukioqaralarpat.

Inatsisartunut ilaasortaq Anna Wangenheim, Demokraatit

Immikkoortup 12-ip aappassaaneerneqarnissaa oktobarip ulluisa 22-annit novembarip ulluisa 12-iannut nuunneqarpoq.

Tassani pineqarpoq:

Unnuinermut akitsuut pillugu Inatsisartut inatsisissaattut siunnersuut.

Aningaasaqarnermut Akileraartarnermullu Naalakkersuisoq

Immikkoortup 118-ip aappassaaneerneqarnissaa oktobarip ulluisa 22-annit novembarip ulluisa 12-iannut nuunneqarpoq.

Tassani pineqarpoq:

Eqqumiitsuliortut eqqumiitsuliornikkut suliaqartillutik akissarsiaasa B-Indkomstitut tigusinnaalersillugit periarfissaqalernissaat pillugu Naalakkersuisut peqquneqarnissaannik

Inatsisartut aalangiiffigisassaattut siunnersuut.

Inatsisartunut ilaasortaq Aqqalu C Jerimiassen, Atassut

Allannguutit Inatsisartut nittartagaanni takuneqarsinnaapput.

Taasisarnerit eqqarsaatigalugit uku akornanni isumaqatigiissuteqartoqarpoq

Aqqalu C. Jerimiassen, atassut aamma Doris Jakobsen Jensen, Siumut.

Knud Mathiassen, Naleraq aamma Najaaraq Møller, Siumut.